

**Penyingkiran Najib beri laluan tindakan undang-undang terhadapnya,  
kata Muhyiddin  
Malaysian Insider  
Mac 8, 2016**

Peletakan jawatan Perdana Menteri Datuk Seri Najib Razak tidak akan menyebabkan kerajaan Barisan Nasional (BN) digulingkan, sebaliknya ia akan memberi laluan kepada proses tindakan undang-undang diambil terhadapnya dan akan diadili di mahkamah, kata Tan Sri Muhyiddin Yassin hari ini.

Menulis di laman Facebook miliknya, Muhyiddin berkata reformasi secara total perlu dilaksanakan untuk mewujudkan sebuah kerajaan yang bersih, telus dan amanah.

"Mereka juga berkata, seorang perdana menteri tidak boleh dijatuhkan kecuali menerusi pilihan raya. Di sinilah letaknya kesilapan besar mereka.

"Jika sebahagian besar rakyat menolak kepimpinan Najib, maka sewajarnya Najib berundur sekarang.

"Jangan tunggu sampai pilihan raya. Jika menolak Najib dalam pilihan raya, bermakna mereka akan menolak BN secara total. Ini akan menyebabkan, kalah dalam pilihan raya," kata bekas timbalan perdana menteri yang disingkirkan pada Julai tahun lalu.

Beliau berkata demikian merujuk kepada gesaan pengunduran Najib melalui Deklarasi Rakyat bersama Tun Dr Mahathir Mohamad dan pemimpin Pakatan Harapan.

Selain Muhyiddin, deklarasi itu turut ditandatangani Naib Presiden Umno Datuk Seri Shafie Apdal dan bekas menteri besar Kedah Datuk Seri Mukhriz Mahathir.

Deklarasi itu menerima pelbagai kritikan daripada pemimpin Umno dan menggesa memecat ahli parti yang dikatakan bersekongkol dengan pembangkang.

Muhyiddin berkata, desakan supaya Najib berundur tanpa menunggu pilihan raya dengan tidak mengubah kerajaan sedia ada bukan perkara baharu sebagaimana yang pernah berlaku pada era pentadbiran Tunku Abdul Rahman, Tun Hussein Onn dan terakhir, Tun Abdullah Badawi yang berundur untuk beri laluan kepada Najib memimpin negara.

Cuma katanya, yang menjadikan perbezaan tuntutan berundur antara perdana menteri terdahulu dengan sedia ada adalah atas sebab politik dan bukannya isu skandal negara.

"Mereka menggunakan pelbagai alasan yang pelik untuk mencemuh deklarasi ini. Ada yang mengatakan kononnya deklarasi ini tidak demokratik.

"Saya ingin beritahu mereka dalam sebuah negara yang demokratik, hak rakyat

untuk menyuarakan pandangan adalah dijamin Perlembagaan. Ini termasuk untuk menyatakan sikap terhadap kerajaan dan kepimpinan negara.

"Meminta seorang perdana menteri berundur kerana pembabitannya dalam skandal kewangan adalah sebahagian daripada hak rakyat dalam sebuah negara demokrasi," tulisnya. – 8 Mac, 2016.

Copyright © 2015 Edge Insider Sdn Bhd

Source:

<http://www.themalaysianoutsider.com/bahasa/article/penyingkiran-najib-beri-laluan-tindakan-undang-undang-terhadapnya-kata-muhy>